

Britta Lessow Tästensen è la nova presidenta da la GCEE

■ (anr/am) La Giuventetgna da las Cuminanzas Etnicas Europeicas (GCEE) ha tegni dacurt sia radunanza generala a Fünfkirch el sid da l'Ungaria. La è Britta Lessow Tästensen vegnida elegida sco nova presidenta. En absenza, ma cun ina gronda maiortad da 78 da totalmain 84 vuschs han ils delegads da las uniuns commembras da la GCEE elegì Britta Lessow Tästensen sco nova presidenta en la suprastanza. La GCEE è in'uniun che s'engascha per giuvenils da minoritads autoctonas e naziunalas da tut l'Europa. Actualmain quinta la GCEE 39 uniuns-commembras, tranter auter era la Giuventetgna Rumantscha (GiuRu). Cun agid da las uniuns, dals dus collavuratur en il biro a Berlin e la suprastanza organischan els mintg'onn plirs arranschaments nua ch'ils giuvenils pon ir per circa in'emna a visitar mintga giada in'otra minoritad. La finamira da la GCEE è da porscher ina plattforma nua ch'ils giuvenils da las differentas minoritads pon barattar lur experientschas, problems e propostas per soluziuns. La GCEE cumbatta era en la politica per dretgs da minoritads.

Ch'ella s'allegra per sia nova lezia, ha Tästensen scrit als commembers da la GCEE. Ella è creschida si en la regiun da cunfin tranter la Germania e Denmarc.



La nova presidenta da la GCEE, Britta Lessow Tästensen, deriva da Denmarc.

FOTO J. VIKNER

Ella appartegna a la minoritad tudestga en Denmarc, viva e studegia ussa però a Copenhagen. Il prossem arranchament da la GCEE ha lieu ils 7 fin ils 14 d'avust a Moscau.